



**Konvensaun Internasionál kona-ba
Protesaun Direitu Traballadór
Migrante hotu-hotu no Membru husi
sira-nia Família**

Distr.: Jerál
2 Maiu 2014

Orijinál: Inglés

**Komité kona-ba Protesaun Direitu Traballadór Migrante hotu-hotu no Membru husi sira-nia
Família**

**Lista kestaun molok entrega Timor-Leste nia relatóriu
inisiál***

Komité kona-ba Protesaun Direitu Traballadór Migrante hotu-hotu no Membru husi sira-nia Família, iha sesaun da-14 nia laran (A/66/48, Nú. 26), estabelese prosedimentu ne'ebé kompostu husi prepara no adota lista kestaun ne'ebé tenke hato'o ba Estadu-Parte relevante, molok Estadu-Parte ne'e entrega nia relatóriu. Bazeia ba Artigu 73, número 1 husi Konvensaun, Estadu-Parte nia relatóriu sei kontein resposta ba lista kestaun refere. Tuir Assembleia Jerál nia Rezolusaun 68/268, número 16, relatóriu ne'e la bele liu lia-fuan 31.800.

Bele mós hato'o lista kestaun ba Estadu-Parte ida, bainhira Komité decide atu ezamina implementasaun Konvensaun sein relatóriu ida, tuir regra 31 *bis* husi regra provizória prosedimentu (A/67/48, número. 26).

* Adota husi Komité iha sesaun da-20 (31 Marsu–11 Abril 2014).

Parte I

Iha Seksaun ida-ne'e, Estadu-Parte simu pedidu hodi entrega nia resposta sira ba pergunta hirak tuir mai.

A. Informasaun Jerál

1. Favór fó informasaun kona-ba enkuadramentu legál iha rai laran kona-ba Konvensaun, ne'ebé inklui:

(a) Konvensaun nia pozisaun ierárkika iha lei doméstika no karik Konvensaun bele aplika direktamente, ka sai parte iha lei doméstika liuhosi lejizlasaun ne'ebé aplika konvensaun ne'e;

(b) Informasaun kona-ba Estadu-Parte nia lejizlasaun nasional ne'ebé relasiona ho protesaun ba traballadór migrante no membru husi sira-nia família no mós informasaun kona-ba polítika sira migrasaun nian ne'ebé relevante ho Konvensaun;

(c) Medida sira ne'ebé Estadu-Parte adota ona hodi armoniza nia lejizlasaun ho dispozisaun sira iha Konvensaun;

(d) Informasaun kona-ba akordu bilaterál no multilaterál ho nasaun sira seluk iha área migrasaun, liuliu ho Austrália, Indonézia, Malázia, Portugal no República Koreaia.

2. Favór fó informasaun kona-ba polítika no estratéjia hotu-hotu ne'ebé Estadu-Parte adota ona ne'ebé relasiona ho traballadór migrante no membru husi sira-nia família. Favór inklui informasaun kona-ba objetivu no alvu sira ne'ebé espesífiku, ho prazu no bele sukat, hodi monitoriza loloos progresu hodi implementa direitu sira ne'ebé pertense ba traballadór migrante no membru husi sira-nia família iha Estadu-Parte refere, no informasaun kona-ba rekursu ne'ebé aloka ona hodi implementa direitu sira, no rezultadu ne'ebé hetan ona.

3. Favór fó informasaun kona-ba ministériu ka instituisaun governamental ne'ebé iha responsabilidade ba koordenasaun no monitorizasaun intergovernamental hodi haree katak Estadu-Parte implementa Konvensaun ne'e, inklui informasaun kona-ba pesoál no rekursu sira ne'ebé disponivel, no mós atividade monitorizasaun no prosedimentu akompañamentu.

4. Favór fó informasaun, inklui dadus kualitativu no estatístiku ne'ebé dezagregadu bazeia ba seksu, idade, nasionalidade no estatutu migrasaun, kona-ba fluksu migrasaun maundobra, inklui sira ne'ebé fila hikas, no mós kona-ba kestaun seluk ruma ne'ebé relasiona ho migrasaun maundobra. Favór mós fó dadus estatístiku, ka karik laiha dadus ezatu, fó estudu ka estimativa sira, kona-ba traballadór migrante iha situasaun irregulár.

5. Favór indika karik iha mekanizmu independente ida, hanesan instituisaun nasional kona-ba direitus umanus ka Provedór, ho mandatu hodi independentemente monitoriza implementasaun direitus umanus iha Estadu-Parte nia laran, inklui direitu sira ne'ebé pertense ba traballadór migrante no membru husi sira-nia família bazeia ba Konvensaun. Favór mós fó informasaun kona-ba mekanizmu sira atu hatu'o keixa, liña telefónika ne'ebé fó assisténsia no servisu sira seluk ne'ebé instituisaun refere oferese. Aleinde ida-ne'e, favór

fó informasaun kona-ba rekursu umanu, tékniku no finanseiru ne'ebé disponivel ba instituisaun refere, no atividade ne'ebé Estada-Parte halo ona hodi hasa'e konxiénsia iha públiku nia leet no liuliu ba traballadór migrante sira, kona-ba servisu sira ne'ebé instituisaun oferese, inklui direitu atu hato'o keixa diretamente ba instituisaun ne'e.

6. Favór fó informasaun detallada kona-ba pasu sira ne'ebé Estada-Parte adota ona hodi promove no socializa Konvensaun no hodi hasa'e konxiénsia no komprensaun kona-ba Konvensaun nia dispozisaun sira ba públiku en jerál, traballadór migrante no membru husi sira-nia família, empregadór, profesór, pesoál saúde no ofisiál governu, inklui pesoál ne'ebé aplika lei no membru judisiáriu. Relasiona ho traballadór migrante sira ne'ebé sidadaun husi Estada-Parte no serbisu iha rai li'ur, favór deskreve mós medida sira ne'ebé Estada-Parte adota ona hodi promove programa formasaun, inklui kona-ba sensibilidade jéneru, ba funsióariu governu ne'ebé lida ho kestaun migrasaun. Liuliu, favór fó informasaun kona-ba formasaun ne'ebé fó ona ba sira ne'ebé fó asisténsia legál no konsulár ba sidadaun sira husi Estada-Parte ne'ebé serbisu iha rai li'ur no buka justisa tanba hetan abuzu iha serbisu-fatin, no kona-ba traballadór migrante ka membru husi sira-nia família ne'ebé hetan kapturasaun, prizaun, ka detensaun enkuantu hein julgamentu ka hetan detensaun seluk ruma.

7. Favór fó informasaun kona-ba kooperasaun entre Estada-Parte no organizasaun sociedade sivíl ne'ebé tau matan ba traballadór sira-nia direitu relasiona ho implementasaun Konvensaun ne'e. Relatóriu balu foun daudaun ne'e indika katak iha organizasaun sociedade sivíl menus liu ne'ebé tau matan ba traballadór sira-nia direitu iha Estada-Parte, maski Artigu 9 husi Lei Imigrasaun no Azilu inklui dispozisaun ida kona-ba sira-nia estabesimentu. Favór indika karik representante sira husi organizasaun sociedade sivíl envolve hela iha prosesu prepara resposta sira ba lista kestaun ne'ebé temi iha leten, no karik sira envolve duni, favór deskreve sira-nia envolvimentu.

8. Favór fó informasaun kona-ba ezisténsia ajénsia privada sira empregu nian iha Estada-Parte ne'ebé rekruta traballadór migrante hodi serbisu iha rai li'ur, no lei, regra no regulamentu sira ne'ebé relasiona ho rekrutamentu privadu, liuliu:

(a) Medida ne'ebé adota ona hodi fó informasaun no formasaun ba traballadór migrante kona-ba sira-nia direitu no devér, no mós hodi proteje sira hasoru situaun empregu ne'ebé hamosu abuzu ba sira;

(b) Karik rekrutadór sira iha responsabilidade konjunta ho empregadór ba reklamasaun no responsabilidade ruma ne'ebé dalaruma mosu relasiona ho implementasaun kontratu empregu, inklui saláriu, ema mate, no mós kompensasaun no repatriasaun ba ema ne'ebé hetan defisiénsia;

(c) Informasaun relasiona ho fó-sai no renova lisensa ba ajénsia empregu nian no rekizitu sira hodi renova sira-nia lisensa;

(d) Informasaun kona-ba keixa hasoru ajénsia sira, no kona-ba inspesaun, pena no sansaun bainhira sira la kumpre regra sira;

(e) Medida sira ne'ebé Estada-Parte adota ona hodi hametin sistema governu ne'ebé iha daudaun hodi regula lisenziamentu ba ajénsia rekrutamentu sira, mekanizmu regulamentu no kontrolu ba migrasaun hodi garante katak ajénsia privada sira rekrutamentu nian la husu taxa exesiva ba utilizadór, no la sai intermediáriu ba rekrutadór sira iha rai li'ur ne'ebé halo prátika abuziva.

9. Favór fó mós informasaun kona-ba ema Timoroan nia fluksu migrasaun globál depoizde hetan independénsia, no indika ema Timoroan na'in hira mak fila hikas, no husi ne'ebé, sidadaun Timoroan na'in hira mak sei hela iha rai li'ur, no idéntika nasaun sira ne'ebé maioria Timoroan hela daudaun, no difikuldade sira boot liu ne'ebé Timor-Leste enfrenta relasiona ho migrasaun.

B. Informasaun relasiona ho artigu sira iha Konvensaun

1. Prinsípiu jerál

10. Favór indika karik ofisiál sira iha administrasaun direktamente aplika Konvensaun ne'e no/ka ema ruma invoka Konvensaun ne'e direktamente iha tribunál sira-nia oin, no karik tribunál sira aplika Konvensaun ne'e. Karik iha, favór fó ezemplu. Favór mós fó informasaun kona-ba: (a) mekanizmu judisiál no/ka administrativu ne'ebé iha kompeténsia hodi ezamina no foti desizaun kona-ba keixa ne'ebé hato'o husi traballadór migrante no membru husi sira-nia família, inklui traballadór sira iha situasaun irregulár; (b) keixa sira ne'ebé mekanizmu ne'e ezamina ona iha tinan lima ikus mai no rezultadu sira; (c) kualkér reparasaun, inklui kompensasaun, ne'ebé fó ba vítima sira ne'ebé hetan violasaun refere; no (d) kualkér medida ne'ebé adota ona hodi informa traballadór migrante no membru husi sira-nia família kona-ba remédiu sira ne'ebé disponivel ba sira bainhira sira sofre violasaun hasoru sira-nia direitu.

2. Parte II husi Konvensaun

Artigu 7

11. Favór klarifika karik lejislasaun nasional garante katak traballadór migrante hotu-hotu no membru husi sira-nia família goza direitu sira ne'ebé hatuur ona iha Konvensaun sein diferensa ruma, no karik lejislasaun nasional inklui tipu diskriminasaun hotu-hotu ne'ebé bandu iha Konvensaun (art. 1, número 1, no art. 7), inklui seksu, lingua, orijen nasional, étnika ka sosiál, nasionalidade, idade, pozisaun ekonómika, patrimóniu, estadu sivil, estadu moris nian ka estadu seluk. Favór mós fó informasaun kona-ba sensibilidade jéneru iha lei doméstika sira kona-ba migrasaun. Aleinde lejislasaun, favor fó informasaun kona-ba medida hotu-hotu ne'ebé Estadu-Parte adota ona hodi garante naun-diskriminasaun, iha lei sira no mós iha prátika. Favór fó mós informasaun liután kona-ba asesu ba kuidadu saúde no servisu sosiál sira seluk ba traballadór migrante no membru husi sira-nia família iha situasaun regulár no irregulár, no mós edukasaun ba traballadór migrante nia oan iha situasaun regulár no irregulár.

3. Parte III husi Konvensaun

Artigu 8 to'o 15

12. Favor fó informasaun kona-ba medida sira ne'ebé adota ona hodi kombate esplorasau maundobra nian ba traballadór sira, inklui sira iha situasaun irregulár, liuliu sira iha setór komersiál, konstrusaun, peska no ospitalidade. Favór fó mós informasaun kona-ba medida sira ne'ebé adota ona hodi kombate esplorasau liuhosi prostituisaun hasoru migrante fetu iha Estadu-Parte, no medida sira ne'ebé adota ona hodi proteje migrante labarik iha Estadu-Parte hasoru traballu forsadu no hasoru esplorasau no abuzu seksuál.

13. Favor fó informasaun kona-ba medida sira ne'ebé Estadu-Parte adota ona hodi kombate rasizmu, hahalok diskriminatóriu, tratamentu aat no violénsia ne'ebé dirije ba traballadór migrante no membru husi sira-nia família.

Artigu 16 to'o 22

14. Favór deskreve salvaguarda sira hodi tane aas prosesu legál ne'ebé loos iha situasaun investigasaun, kapturasaun no detensaun ba traballadór migrante no membru husi sira-nia família ba ofensa kriminál no infrasaun administrativa, inklui kestaun sira ne'ebé relasiona ho imigrasaun. Favór mós fó informasaun kona-ba kondisaun detensaun ba traballadór

migrante no indika karik Estadu-Parte adota ona medida alternativa aleinde detensaun ba kestaun sira ne'ebé relasiona ho imigrasaun.

15. Favor fó informasaun kona-ba medida sira ne'ebé adota ona hodi garante katak: (a) só bele hasai (halo espulsaun) traballadór migrante no membru husi sira-nia família husi Estadu-Parte nia territóriu bazeia ba desizaun ida husi autoridade ne'ebé competente no independente, bazeia ba prosedimentu ida ne'ebé estabesele ona tuir lei no kumpre Konvensaun; (b) iha possibilidade atu hato'o rekursu no husu revizaun ba desizaun ne'e, liuliu relasiona ho akontesimentu balu ne'ebé relata ona, iha ne'ebé Unidade Polísia Marítima Timor-Leste (MPU) hapara ró = ho migrante sira ne'ebé diriye bá Austrália liuhosi tasi; no (c) enkuantu hein rekursu refere, ema refere iha direitu atu hato'o pedidu hodi suspende desizaun atu hasai ne'e husi Estadu-Parte nia territóriu.

16. Komité iha preokupasaun kona-ba relatóriu sira ne'ebé simu ona katak traballadór balu ne'ebé laiha autorizasaun hetan multa ka deportadu ba sira-nia país orijen. Parese katak autoridade sira hili deportasaun liuliu iha kazu ne'ebé hapara ró ho migrante sira ne'ebé diriye bá Austrália liuhosi tasi. Favór fó informasaun atualizada, inklui dadus estatístiku ne'ebé dezagregadu, kona-ba traballadór migrante no sira-nia família, ne'ebé sein dokumentu no irregulár, ne'ebé hetan espulsaun, no kona-ba prosedimentu deportasaun. Favór indika karik iha kazu espulsaun koletiva no fó informasaun kona-ba lei sira ne'ebé regula kona-ba kestaun espulsaun koletiva. Favór mós indika oinsá Estadu-Parte garante prosesu loloos ba ema indivíduu iha kazu espulsaun koletiva. Favór indika karik traballadór migrante bele dezafia orden espulsaun no karik remédiu hanesan ne'e suspende ezeekusaun ba orden refere.

Artigu 23

17. Favór fó detalhe kona-ba servisu konsulár ne'ebé Estadu-Parte fornese ba sidadaun sira ne'ebé serbisu iha rai li'ur, inklui sira iha situasaun irregulár. Favór indika karik fornese asisténsia legál, inklui iha kazu detensaun no/ka espulsaun. Favór mós indika karik traballadór migrante no membru husi sira-nia família iha Estadu-Parte iha direitu atu hetan protesasaun no asisténsia husi autoridade konsulár no diplomátika iha sira-nia País orijen bainhira iha violasaun hasoru direitu sira ne'ebé rekoñesidu iha Konvensaun, liuliu iha kazu kapturasaun, detensaun no espulsaun.

Artigu 25 to'o 30

18. Komité nota katak lejjizlasaun Timor-Leste kona-ba traballu hatuur katak traballadór estranjeiru ne'ebé hetan empregu iha direitu no devér ne'ebé hanesan ho traballadór nasional (2012 Kódigu Traballu, art. 77). Komité nota mós katak relasiona ho ema estranjeiru ne'ebé promove atividade komersiál, lei kona-ba lisensiamentu komersiál hatuur katak sidadaun timoroan de'it mak bele halo atividade komersiál iha merkadu tradisionál ka komérsiu ambulante (art. 6, número 3 Dekretu-Lei Nº. 24/2011 iha data 8 Juñu 2011). Favór indika karik direitu traballu ne'ebé pertense ba sidadaun nasional aplika ho maneira iguál ba traballadór migrante, iha tantu situasaun regulár komu irregulár, no fó klarifikasaun relasiona ho kazu hirak ne'ebé haree diferença entre sidadaun nasional no ema estranjeiru.

19. Favór informa Komité kona-ba medida sira ne'ebé Estadu-Parte adota ona hodi garante direitu ba labarik sira husi traballadór migrante ne'ebé serbisu iha rai li'ur, inklui traballadór migrante sira-nia oan ne'ebé laiha dokumentu ka iha situasaun irregulár, hodi rejista sira iha momentu moris mai no garante sira-nia nasionalidade orijen tuir lei no iha prátika. Favor fó informasaun kona-ba medida sira ne'ebé adota ona hodi garante katak migrante estranjeiru sira-nia oan sei rejista kedas iha momentu moris mai iha Estadu-Parte. Favór mós espesífika karik labarik husi traballadór migrante ne'ebé laiha dokumentu ka iha situasaun irregulár goza direitu ba edukasaun.

4. Parte IV husi Konvensaun

Artigu 41

20. Favor fó informasaun kona-ba pasu sira ne'ebé Estadu-Parte adota ona hodi fó oportunidade ba nia sidadaun sira ne'ebé hela no serbisu iha rai li'ur atu vota no sai eleitu iha eleisaun sira ne'ebé hala'o iha Estadu-Parte.

Artigu 44

21. Favór deskreve medida sira ne'ebé Estadu-Parte adota ona hodi garante protesaun ba unidade husi traballadór migrante sira-nia família no atu facilita reunifikasaun ba traballadór migrante ho sira-nia kaben ka ema ne'ebé iha relasaun ho traballadór migrante, ne'ebé bazeia ba lei ne'ebé vigora, iha efeitu ne'ebé hanesan ho kazamentu, no mós ho sira-nia menór ne'ebé dependente no seidak kaben.

Artigu 45

22. Favor fó informasaun kona-ba medida ne'ebé Estadu-Parte foti ona hodi garante asesu ba instituisaun no servisu edukasionál, orientasaun profisionál no instituisaun formasaun no servisu sira. Favór mós fó informasaun kona-ba medida sira ne'ebé Estadu-Parte adota ona hodi facilita integrasaun ba traballadór migrante sira-nia oan iha sistema eskola lokál, inklui hanorin sira ho lian lokál no sira-nia lingua materna no kultura.

Artigu 46 to'o 48

23. Favór fó informasaun atualizada ne'ebé detallada kona-ba akordu bilaterál no multilaterál ne'ebé halo ona iha área migrasaun, liuliu programa traballu temporáriu no akordu sira seluk kona-ba empregu, protesaun, dupla tributasaun no seguransa sosiál ba traballadór migrante no membru husi sira-nia família. Kona-ba ida-ne'e, favór fornese mós informasaun kona-ba akordu ne'ebé halo ona ho Estadu membru Asosiasaun husi Nasaun sira Sudeste Aziátiku nian (ASEAN) kona-ba kestaun sira ne'ebé relasionadu, no kona-ba Timor-Leste nia estatutu iha ASEAN.

Artigu 49

24. Favór klarifika karik lejizlusaun nasional hatuur katak tenke iha autorizasaun ketaketak hodi hela iha rai laran no halo serbisu. Karik nune'e duni, favor fornese informasaun karik traballadór migrante sira hetan ka la hetan autorizasaun atu hela iha rai laran ba pelumenus período hanesan ho sira-nia autorizasaun atu halo atividade remunerada. Aleinde-ne'e, Lei kona-ba Imigrasaun no Azilu la espesifika pre-rekizitu sira ne'ebé aplikavel ba migrante sira ne'ebé iha ona vistu traballu no hakarak husu autorizasaun atu hela iha rai laran. Favór fó klarifikasaun kona-ba ida-ne'e.

25. Favor fó informasaun kona-ba medida sira ne'ebé adota ona hodi garante katak traballadór migrante iha Estadu-Parte iha liberdade atu hili sira-nia atividade remunerada sein haree katak sira iha situaun irregulár, no la lakon sira-nia autorizasaun atu hela iha rai laran iha kazu katak sira-nia atividade remunerada termina ona molok sira-nia autorizasaun serbisu remata ka autorizasaun seluk ruma remata. Aleinde-ne'e, favor fó informasaun kona-ba medida sira ne'ebé adota ona hodi garante katak, iha kazu hanesan ne'e, labele kansela sira-nia autorizasaun atu hela iha rai laran pelumenus ba período ne'ebé korresponde ho período ida ne'ebé traballadór migrante dalaruma iha direitu atu simu subsidiu dezempregu.

5. Parte V husi Konvensaun

Artigu 58

26. Komité simu informasaun katak Timor-Leste introdús Kartaun Atravesa Fronteira nu'udar rezultadu husi akordu entre Estadu-Parte no Repúblika Indonézia kona-ba ponte tradisionál sira atu atravesa fronteira no merkadu sira ne'ebé regulamentadu, ne'ebé ratifika ona liuhosi Rezolusaun 21/2009, hodi fasilita pasajen fronteira lokál. Favor fó informasaun kona-ba medida sira ne'ebé adota ona hodi implementa planu ne'ebé iha objetivu atu hadi'ak situaun ba traballadór fronteiriku, no atu inklui definisaun kona-ba traballadór fronteiriku iha lejislasaun nasional no mós dispozisaun espesífika ne'ebé relasiona ho protesaun ba sira-nia direitu, tuir Artigu 58 husi Konvensaun. Aleinde ida-ne'e, favor fó informasaun kona-ba medida ruma ne'ebé adota hodi hadi'ak traballadór fronteiriku sira-nia situaun ne'ebé hela iha rejiaun Oekusi.

6. Parte VI husi Konvensaun

Artigu 64

27. Favor fó informasaun kona-ba medida sira ne'ebé adota ona hodi prevene migrasaun irregulár, inklui liuhosi akordu internasionál, polítika no programa sira. Favór inklui informasaun kona-ba oinsá medida hanesan ne'e integradu ona iha polítika no programa jerál kona-ba migrasaun, no indika karik iha ona estimativa definitiva kona-ba número migrante irregulár.

Artigu 67

28. Favor fó informasaun kona-ba esforsu sira ne'ebe halo ona hodi tulun traballadór migrante no membru husi sira-nia família ne'ebé fila hikas, liuliu labarik sira, iha sira-nia prosesu reintegrasaun ba vida ekonómika no sosiál iha Estadu-Parte.

Artigu 68

29. Favór indika medida sira ne'ebé Estadu-Parte adota ona hodi kombat tráfiku no kontrabandu migrante, liuliu ba fetu no labarik, inklui deteta loloos traballadór migrante no membru husi sira-nia família ne'ebé iha movimentu ilegál ka klandestinu, ho maneira sistemátika halibur dadus dezagregadu no lori ba justisa ema sira ne'ebé halo tráfiku no kontrabandu ba migrante sira. Favór fó informasaun atualizada kona-ba número kazu ne'ebé relata ona ne'ebé envolve trázitu no kontrabandu ba migrante sira, investigasaun, prosedimentu kriminal, no sentensa ne'ebé hatún ba infratór sira dezde 2008. Komité interesadu liu hodi hetan informasaun atualizada kona-ba desenvolvimentu resente kona-ba medida espesífika iha lejislasaun ne'ebé Estadu-Parte fó-sai kona-ba tráfiku umanu. Komité iha preokupasaun partikulár katak Artigu 81 husi Lei Imigrasaun no Azilu la kontein referénsia ruma hodi fó apoiu ba vítima husi tráfiku umanu, enkuantu sira rekupera hela, ka prosedimentu ruma atu fó protesaun ba sira.

Parte II

Iha Seksaun ida-ne'e, Komité husu Estadu-Parte atu fó informasaun badak (másimu pájina tolu) kona-ba protesaun ba traballadór migrante no membru husi sira-nia família relasiona ho:

- (a) Lei ka deketu-lei no sira-nia regulamentu ketaketak;
- (b) Instituisaun no sira-nia mandatu no reforma institusionál;

(c) Polítika, programa no planu asaun ne'ebé lida ho migrasaun, inklui sira-nia ámbitu no finansiamentu;

(d) Ratifikasaun resente ba instrumentu sira direitus umanus nian, inklui Organizasaun Internasionál Traballu (ILO) nia Konvensaun Nú. 97 (1949) kona-ba Migrasaun ba Empregu, Konvensaun ILO Nú. 143 (1975) kona-ba Migrasaun iha Kondisaun Abuziva no Promosaun Igualdade iha Oportunidade no Tratamentu ba Traballadór Migrante sira no Konvensaun ILO Nú. 189 (2011) kona-ba traballu dignu ba traballadór doméstiku;

(e) Pasu sira hodi halo deklarasaun sira ne'ebé hatuur iha Artigu 76 no 77 husi Konvensaun;

(f) Estudu abranjente sira ne'ebé iha foun daudaun ne'e kona-ba situasaun traballadór migrante no membru husi sira-nia família.

Parte III

Dadus, estimativa ofisiál, estatística no informasaun seluk, karik disponivel

1. Karik disponivel, favór fó dadus estatístiku ne'ebé atualizadu no dezagregadu ba tinan tolu ikus mai (exetu iha instrusaun seluk) kona-ba:

(a) Traballadór migrante iha detensaun laran iha Estadu-Parte no Estadu empregu;

(b) Traballadór migrante no membru husi sira-nia família ne'ebé hetan espulsaun ka deportasaun husi Estadu-Parte iha tinan lima ikus mai;

(c) Númeru labarik migrante or migrante nia oan ne'ebé la akompañada no separadu husi sira-nia aman-inan iha Estadu-Parte;

(d) Transferénsia osan husi traballadór migrante ne'ebé sidadaun husi Estadu-Parte ne'ebé serbisu iha rai li'ur no informasaun kona-ba lejislasaun ne'ebé regula transferénsia osan no polítika sira governu nian ne'ebé relasiona ho transferénsia osan no dezentvolvimentu;

(e) Kazu sira ne'ebé relata ona kona-ba tráfikku no kontrabandu migrante, investigasaun, prosesu kriminál, no sentensa ne'ebé hatún ba infratór sira (ho dadus dezagregadu bazeia ba seksu, idade, nasionalidade no objetivu husi tráfikku ne'e) no informasaun kona-ba tendénsia nasional tráfikku umanu nian;

(f) Servisu asisténsia legál ne'ebé fó ba traballadór migrante no membru husi sira-nia família iha Estadu-Parte nia laran no mós kona-ba sidadaun husi Estadu-Parte ne'ebé serbisu iha rai li'ur;

(g) Pedidu ba reunifikasaun família ne'ebé halo ona kada tinan durante tinan neen ikus mai ba ema Timoroan no ema estranjeiru, dezagregadu bazeia ba rekerente nia estatutu (sidadaun Timor-Leste, ema ne'ebé iha Autorizasaun Espesiál atu hela iha rai laran, ema ne'ebé iha Autorizasaun Rezidénsia, nst.). Favór fó dadus kona-ba rezultadu husi pedidu refere, inklui detalle kona-ba rekursu, ho dadus dezagregadu hanesan temi iha leten;

(h) Mekanizmu sira ne'ebé iha objetivu atu halibur dadus estatístiku kuantitativu ne'ebé dezagregadu no informasaun kualitativa kona-ba traballadór migrante sira-nia direitu, ne'ebé korresponde ho Konvensaun iha Estadu-Parte nia laran no li'ur. Karik aplikavel, favór fó mós informasaun kona-ba oinsá mekanizmu hirak-ne'e funsiona, inklui indikadór sira kona-ba susesu no rezultadu sira.

2. Favór fó informasaun adisionál kona-ba kualkér dezvoltimentu no medida importante ne'ebé adota daudaun hodi implementa Konvensaun ne'ebé Estadu-Parte konsidera nu'udar prioridade.

3. Favór entrega informasaun jerál no loloos kona-ba Timor-Leste, bazeia ba orientasaun armonizada kona-ba oinsá tenke halo relatóriu relasiona ho tratadu internasionál direitus umanus nian, inklui Konvensaun (HRI/GEN/2/Rev.6). Favór mós entrega Estadu-Parte nia dokumentu prinsipál, bazeia ba orientasaun refere kona-ba oinsá tenke halo relatóriu, karik seidakuk entrega dokumentu refere. Dokumentu prinsipál sei komplementa resposta sira ba lista kestaun ne'e.
